

# এসএসসি ও সমমান পরীক্ষার ফলাফলের তারিখ জানালেন শিক্ষামন্ত্রী

নিজস্ব প্রতিবেদক

০৮ জুন ২০২৬, ০৪:৩৪ পিএম



ফাইল ছবি: সংগৃহীত

চলতি বছরের মাধ্যমিক স্কুল সার্টিফিকেট (এসএসসি) ও সমমান পরীক্ষার ফলাফল ঘোষণা করা হবে আগামী ২০ জুলাই। এ বিষয়ে সংশ্লিষ্টদের নির্দেশ দেওয়া হয়েছে বলে জানিয়েছেন শিক্ষামন্ত্রী আ ন ম এহছানুল হক মিলন। আজ সোমবার সচিবালয়ে এক সংবাদ সম্মেলনে শিক্ষামন্ত্রী এ কথা জানান।

সংবাদ সম্মেলনে শিক্ষামন্ত্রী বলেন, আমরা কারিকুলাম নিয়ে কাজ করছি। এটি পরিমার্জনের জন্য ব্যাপক কার্যক্রম চলমান রয়েছে। ২০২৭ সালে চারটি নতুন বিষয় অন্তর্ভুক্ত করা হবে। আর নতুন কারিকুলাম বাস্তবায়ন করা হবে ২০২৮ সালে।

তিনি আরও বলেন, ‘শিক্ষা মন্ত্রণালয়ের অধীন বিভিন্ন খাতে অতীতের দুর্নীতি, অনিয়ম এবং আর্থিক অসঙ্গতির বিষয়গুলো পর্যালোচনা করে একটি শ্বেতপত্র প্রকাশের পরিকল্পনা নিয়েছে সরকার। বিশেষ করে আওয়ামী লীগ সরকারের ১৭ বছরের শাসনামলে শিক্ষা খাতে সংঘটিত দুর্নীতির বিস্তারিত তথ্য ওই শ্বেতপত্রে তুলে ধরা হবে।’

প্রসঙ্গত, এর আগে চলতি বছরের এসএসসি ও সমমানের পরীক্ষা শুরু হয় ২১ এপ্রিল ২০২৬ থেকে। পরীক্ষা চলে ২০ মে পর্যন্ত। এবারের এসএসসি ও সমমানের পরীক্ষায় মোট ১৮ লাখ ৫৭ হাজারের বেশি পরীক্ষার্থী অংশ নেয়। এখন চলছে ব্যবহারিক পরীক্ষা।